



ye apocalips

C^m 22^m



And he schewide to me a flode of quycke water •
schynynge as crystal: comynge forþe of þe seet of
god/ and of þe lombe/ in þe mydel of þe strete of it •
& on eche syde of þe flode: þe tree of lijf bryngynge
forþ twelue fruytis: by eche monethes zildynge his fruyte • &
þe leeuës of þe tree to helpe of folkis/ and eche curside þing
schal no more be: but þe seetis of god & of þe lombe schulen
be in it • & þe seruauntis of hym schulen serue to hym/ and þei
schulen se his face: & his name in here forhedis/ and nyzt schal
no more be • & þei schulen not haue nede to þe lizte of lanterne
neþer to lizte of sunne: for þe lorde god schal lizten hem • &
þei schulen regne into worldis of worldis/ and he seyde to me/
þes wordis ben moſte feiþful & trewe/ and þe lorde god of spi-
ritis of prophetis sente his aungels for to schewe to his ser-
uauntis: what þingis it bihoueþ for to be done sone/ and lo I
come swiftely/ bleſside be he þat kepith þe wordis of prophecye
of þis booc/ and I Ioon þat herde & ſize þes þingis • & aftir
þat I hadde herde & seyn • I ſel doune þat I schulde worschip
bifore þe seet of þe aungel: þat schewide to me þes þingis/
and he seyde to me/ se þat þou do not/ forsoþe I am þin euen
seruaunt & of þi breþeren prophetis: & of hem þat kepen þe
wordis of prophecie of þis booc/ worschip þou god/ and he
seyde to me/ ſigne (or seele) þou not: þe wordis of prophecye
of þis booc/ forsoþe þe tyme is nyzt/ he þat noyzeþ: noyze zit/
and he þat is in ſilþes: ware foul zit/ and he þat is iuste: be
he zit iustificede/ and þe holy be he halowide zit/ lo I come
sone • & my mede wiþ me for to zilde to eche man aftir his
werkis/ I am alpha & o • þe firste & þe laste • bygynnyng &
ende/ bleſside þei þat waschen here ſtolis in blood of þe lombe:
& þe power of hem be in þe booc of lijf: & by zatis entre into
þe cytee// ¶ Forsoþe wiþ oute forþ houndis & venym doers (or
pisoners) & vnchaſte men • & manquellers • & seruyng to
ydolis • & eche þat loueþ & doith leesynge/ I Iþc sente myn
aungel

ye apocalips

aungel for to witnesse to zow hes pingis/ in chirchis/ I am he
root & kynde of dauyd a schynynge morne sterre/ and he hous-
bonde & he spouse (or wiif) seyn: come þou/ and he þat heriþ:
seiþ: come þou/ and he þat þristiþ: come/ and he þat wole:
take frely þe water of lijf) forsoþe I witnesse to eche man her-
ynge þe wordis of prophecie of þis booc/ zif any man schal
putte to to þes: god schal putte to vpon hym: þe plagis writen
in þe booc/ and zif any man schal do aweye of þe wordis of þe
booc of þis prophecie: and schal take aweye þe parte of hym
fro þe booc of lijf · & fro þe holy cytee · & fro þes pingis þat ben
writen in þis booc/ he seiþ þat beriþ witnessynge of þes pingis:
zhe amen/ I come soone amen/ come þou lorde Ihus/ þe grace
of oure lorde Ihus c̄st: wiþ zou alle amen///

here endiþ þe apocalips
Blesside be þe holy trinite Amē

